

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 रविवार

दिनांक 24.11.2024

प्रमुख समाचार –

- 1— आकाशवाणी ले प्रसारित 'मन की बात' कारीकरम म प्रधानमंत्री ह एनसीसी म अनुशासन अउ सेवा के भावना ल सुरता करत युवा मन ले जादा ले जादा एनसीसी ले जुड़े बर किहीन।
- 2— मुख्यमंत्री विष्णुदेव साय आज राजधानी रईपुर के पुलिस परेड ग्राउण्ड म राखेगे छिहत्तरवां एनसीसी दिवस समारोह म संघरीन।
- 3— अमृत भारत स्टेसन योजना म प्रदेस के बिलासपुर-रईपुर अउ दुरुग रेलवे स्टेसन के करे जाही बढ़वार अउ आधुनिकीकरण के काम।

समाचार विस्तार ले

मन की बात-01

आकाशवाणी ले आज प्रधानमंत्री नरेंद्र मोदी के 'मन की बात' कारीकरम के एक सौ सोलहवां कड़ी के प्रसारण करे गीस। एमा प्रधानमंत्री ह युवा मन ले लेके सियान मन ल साइबर धोखाधड़ी ले बचाय बर आगू आय बर किहीन। ओमन अहमदाबाद के राजीव के उदाहरण देत किहीन कि ओहा लोगन ल डिजीटल अरेस्ट के खतरा के संबंध म बतावत हे। प्रधानमंत्री ह दोहराइन कि कानून म डिजीटल अरेस्ट के कोनो कीसम के प्रावधान नइ हे। ओमन किहीन कि ए बात के उछाह हवय कि हमर युवा साथी लोगन ल ए संबंध म जानकारी दे म भाग लेवत हे। प्रधानमंत्री ह गैर राजनीतिक पृष्ठभूमि के युवा मन ल राजनीति म संघरे के आह्वान करीन। प्रधानमंत्री ह निस्वार्थ भाव ले समाज बर काम करइया युवा मन के संबंध म बात करीन। संगेसंग डिजीटल जीवन प्रमाण पत्र के संबंध म सियान मनखे मनके मदद करइया लखनऊ के विरेन्द्र के प्रशंसा करीन। श्री मोदी ह किहीन कि डिजीटल जीवन प्रमाण पत्र ह सियान मन बर बड़े सुविधा देथे। ओमन किहीन कि अइसन परयास ले डिजीटल जीवन प्रमाण पत्र पवइया लोगन के संख्या अस्सी लाख ले जादा होगे हे।

मन की बात-02

आज राष्ट्रीय कैडेट कोर दिवस म श्री मोदी ह कैडेट के रूप म अपन पाछू दिन ल सुरता करीन। ओमन किहीन कि एनसीसी युवा मन म अनुशासन, अगुवाई करे अउ सेवा के भावना पैदा करथे। प्रधानमंत्री ह युवा मन ले जादा ले जादा संख्या म एनसीसी ले जुड़े बर किहीन। प्रधानमंत्री ह किहीन कि दूनिया भर के दर्जनो देस म लाखो भारतीय हे, जिखर पूर्वज मनके अपन-अपन कहानी हे। ओमन लोगन ले ए कहानी ल नमो ऐप या माय जीओवी डॉट इन म साझा करे बर किहीन। प्रधानमंत्री ह किहीन कि 'एक पेड़ मां के नाम' अभियान सिरिफ पांच महिना म सौ करोड़ पेड़ लगाय के उपलब्धि पा लेहे। प्रधानमंत्री ह स्वच्छता के संबंध म किहीन कि सरकारी कार्यालय मन म गजब जुन्ना फाइल अउ कबाड़ हटाय बर बिसेस स्वच्छता अभियान चलाय गीस।

इही बीच, मुख्यमंत्री विष्णुदेव साय ह आज पुलिस मैस रईपुर म पुलिस जवान मन संग 'मन की बात' कारीकरम सुनिन। उहें, भाजपा के प्रदेस अध्यक्ष किरण सिंह देव ह अपन निवास म प्रधानमंत्री के मन की बात कारीकरम ल सुनिन हे।

मुख्यमंत्री-एनसीसी दिवस समारोह

मुख्यमंत्री विष्णुदेव साय आज राजधानी रईपुर के पुलिस परेड ग्राउण्ड म राखेगे छिहत्तरवां एनसीसी दिवस समारोह म संघरीन। समारोह म बोलत मुख्यमंत्री ह किहीन कि एनसीसी युवा मन म राष्ट्र प्रेम अउ अनुशासन के भावना ल जगाथे अउ राष्ट्रीय एकता ल मजबूत करथे। मुख्यमंत्री ह किहीन कि अभी हमर एनसीसी कैडेट मन ल हवाई उड़ान के अनुभव अउ प्रसिक्षण रईपुर म दे जात हे, जेखर खरच छत्तीसगढ़ शासन देवत हे। प्रदेश म रईपुर के संगेसंग बिलासपुर, अंबिकापुर, जगदलपुर-जशपुर म घलो हवाई पट्टी हे। ए प्रसिक्षण उंहा घलो सुरू करे जा सकथे। एखर ले इंहा के कैडेट मन ल फायदा होही। समारोह म मुख्यमंत्री ह एनसीसी कैडेट मनले परेड के सलामी लीन। एनसीसी दिवस कारीकरम म कैडेट मन ह मार्च पास्ट अउ सांस्कृतिक कारीकरम प्रस्तुत करे के संगेसंग घुड़सवारी, ऐरो मॉडलिंग जइसन प्रस्तुति दीन। मुख्यमंत्री ह बने प्रदर्शन करइया मन ल इनाम बांटिन।

रेलवे स्टेशन उन्नयन कार्य

अमृत भारत स्टेसन योजना म प्रदेश के बिलासपुर-रईपुर अउ दुरुग रेलवे स्टेशन के बढ़वार अउ आधुनिकीकरण के काम करे जाही। बिलासपुर स्टेशन ल चार सौ पैंतीस करोड़ रुपिया, रईपुर स्टेशन ल चार सौ छप्पन करोड़ अउ दुरुग रेलवे स्टेशन ल चार सौ तिरसठ करोड़ रुपिया के लागत ले बढ़वार करे जाही। ए योजना ले यात्री मन के सुविधा म बढ़वार करना स्टेशन परिसर ल सुध्धर बनाना, बने सुरक्षा व्यवस्था, साफ-सफाई, प्रतिकालय के बने रख-रखाव के संगेसंग हरियाली म बिसेस धियान दे जाही।

मुख्यमंत्री-विकास संघ

मुख्यमंत्री विष्णुदेव साय आज राजधानी रईपुर म राखेगे छत्तीसगढ़ अनुसूचित जनजाति, शासकीय सेवक विकास संघ के सपथ ग्रहण समारोह म सामिल होइन। मुख्यमंत्री ह कारीकरम म बोलत किहीन कि अनुसूचित जनजाति समाज हमर संस्कृति के धरोहर, परंपरा ल आगू बढ़इया हे। संगेसंग ए संघ के नवा बने पदाधिकारी मन ल किहीन कि जनजाति समाज के विकास अउ बढ़वार बर राज्य शासन के परयास के संगेसंग आप सबो इन के सहभागिता जरूरी हे।

जवान घायल

सुकमा जिला म आज माओवादी मन कोति ले लगाय गे बम के चपेट म आय ले एक जवान घायल होगे। खबर के मुताबिक जिला के चिंतलनार थाना क्षेत्र के रायगुड़ा कैम्प ले डीआरजी के जवान सर्चिंग म निकले रिहीन। इही दौरान रायगुड़ा के जंगल म माओवादी मन कोति ले लगाय गे बम के चपेट म आय ले डीआरजी के जवान पोडियाम विनोद घायल होगे। घायल जवान के इलाज चलत हे, जिहां ओखर हालत खतरा ले बाहिर हे। उहें, इही जिला म सर्चिंग अभियान के दौरान सुरक्षा बल ह चिंतलनार नरसापुरम रद्दा म माओवादी मन कोति ले लगाय गे बम ल बरामद करके ओला निष्क्रिय कर देहे।

मुख्यमंत्री-लोकार्पण

मुख्यमंत्री विष्णुदेव साय ह काली बिलासपुर के रिवर ब्यू म बने श्रीराम सेतु रद्दा के लोकार्पण करीन। लेजर सो अउ आतिसबाजी ले श्रीराम सेतु रद्दा के लोकार्पण ल उछाह के संग मनाय गीस। संगेसंग बिलासपुर विकास दीप महोत्सव मनाय गीस। ए बेरा म दस हजार दीया अरपा नंदिया म एक संघरा जलाय गीस। उहें, अरपा के दूनों पुल ल सुध्धर लाइट ले सजाय गे रिहीस। समारोह म मुख्यमंत्री ह मल्हार महोत्सव ल बिलासपुर म फेर ले सुरू करे अउ ओखर बर बीस लाख रुपिया के बजट के प्रावधान राखे के घोसना करीन। उहें, मुख्यमंत्री ह बिलासपुर के सिटी कोतवाली म उनतीस करोड़ छिहत्तर लाख रुपिया के लागत ले बनाय गे मल्टीलेवल पार्किंग के लोकार्पण करीन। लोगन के सुविधा बर साढ़े तीन एकड़ म कोतवाली थाना परिसर म तीन मंजिला मल्टीलेवल कार पार्किंग बनाय गेहे।

एखर पहिली, मुख्यमंत्री ह काली बिलासपुर म राखेगे सैतालिसवां राउत नाचा महोत्सव म पारंपरिक वेसभूषा म सामिल होइन अउ यादव समाज ल राउत नाचा परब के बधई दीन।

संविधान दिवस—स्मरणोत्सव

भारतीस संविधान के पचहत्तर बछर पूरा होय म छब्बीस नवंबर ले प्रदेस म साल भर 'हमारा संविधान, हमारा स्वाभिमान' के नाव ले मनाय जाही। ए आयोजन चार स्तंभ संविधान के प्रस्तावना, अपन संविधान ल जानन, संविधान के निर्माण अउ संविधान के गौरव बिसय म केंद्रीय रइही। रईपुर म राखेगे मुख्य कारीकरम म राज्यपाल, मुख्यमंत्री, उपमुख्यमंत्री के संगेसंग विधायक अउ आने लोगन कोति ले संविधान के प्रस्तावना के वाचन करे जाही। संविधान दिवस म स्कूल अउ कॉलेज म प्रश्नोत्तरी, वाद—विवाद, भाषण प्रतियोगिता राखे जाही। संगेसंग अनुसूचित जाति, जनजाति गांव म पंद्रह दिवसीय संविधान यात्रा निकाले जाही। यात्रा के बेरा बाबा साहेब के प्रतिमा म फूल माला चढ़ाय जाही। उहें, ग्राम पंचायत मन म ग्रामसभा के आयोजन होही। एमा नागरिक मनके मौलिक कर्तव्य ल पढ़े अउ समझाय जाही। संगेसंग स्वतंत्रता सेनानी मन ल सम्मानित घलो करे जाही।

कारीकरम म केंद्रीय संस्कृति मंत्रालय कोति ले संविधान म बने फिलिम देखाय जाही। रईपुर म राखेगे कारीकरम म संविधान ले जुड़े कला प्रदर्शनी लगाय जाही।

धान—खरीदी

प्रदेस म धान बिसाय के काम चलत हे। राज्य म अभी तक छै लाख छिहत्तर हजार मीट्रिक टन धान बिसाय गेहे। धान बिसाय म एक लाख चौवालिस लाख किसान मन ल बैंक लिकिंग व्यवस्था ले एक हजार दू सौ अठयासी करोड़ पचपन लाख रुपिया के भुगतान करे गेहे। धान बिसाय के काम इक्तीस जनवरी दू हजार पचीस तक चलही।

मुख्यमंत्री—निशा यादव

मुख्यमंत्री विष्णुदेव साय ह काली बिलासपुर म राखेगे एक ठिन कारीकरम म छत्तीसगढ़ के पर्वतारोही निशा यादव ल स्वेच्छानुदान ले मंजूर करे तीन लाख पैतालिस हजार रुपिया के चेक दीन। ए बेरा म निशा यादव ह मुख्यमंत्री ल बतइन कि ओ ह अफ्रीका महाद्वीप के सबले ऊंची चोटी किलीमंजारो पर्वत ल फतह करना चाहत हे।

मंत्रो—दुर्घटना

महिला अउ बाल विकास मंत्री लक्ष्मी राजवाड़े के काफिला के चार गाड़ी आज आपस म टकरा गे। फेर ए हादसा म कोनों ल चोट नइ आय हे। बताय जात हे कि अंबिकापुर—रामानुजगंज राष्ट्रीय राजमार्ग म ग्राम चरगढ़ के तीर ट्रक चालक के लापरवाही के सेती ए हादसा होइस।

